



# VÖG VOLAPÜKA.

,Daniil Morozov': redakan  
ä vicifal,  
,shido2308@yahoo.com',  
,Ekaterinburg', ,Rossija' / Rusän.

*Jäfidot soga bevünetik Volapükka.*

YELOD 34<sup>id</sup>. NÜM: 7. 2024 YULUL. PADS: 53 jü 64.

## O Volapükflens valöpo!

Finü mayul neflen ömik yufapükas mekavik emobon ad nosü-kön Volapükadilädi ela Wikipedia (ü vükipeda; logolsös bespiki tefik: [,https://meta.wikimedia.org/wiki/Proposals\\_for\\_closing\\_projects/Closure\\_of\\_Volapük\\_Wikipedia\\_2!](https://meta.wikimedia.org/wiki/Proposals_for_closing_projects/Closure_of_Volapük_Wikipedia_2!)!), bi pük obsik binon-la deadik e sikloped tefik te labon-la yegedis fa nünömaprogram itjäfidik pejafölis. Jenot at pato eglifükön obi, bi mob penotükön latikumo mö del bal pos deadam ela Ralph Midgley: proan gretik Volapükka. Danädü guvan nuik siklopedia Volapükik: 'Jan van Steenbergen' < at no plu labon yegedilis susnumik labü set bal (pro finasek at emutom moükön padis plu züldegmälmilis!), e mobs somik binons nensekiks. Too vilob nogna memükön reidanis dö toped at (labü la-det: [,vo.wikipedia.org'](https://vo.wikipedia.org/)), keli kanols gudükumön. Kikodo dabin ona attimo veütön-li? Balido toped et binon med ad jenöfükön desini vödabuka siklopedik Volapükik, kelosi nog ciful: 'Albert Sleumer' ün 1935 emäniotom. Telido 'Wikipedia' jonon mödikanes, das Volapük jünu pagebon, dub kelos stigädon ad lärnön puki at. Kili-do labon nünis saido mödikis dö Volapükans, klu kanon kipedön vödemis somik pro vestigans fütürük Volapükamufa. Levüdöb olis valik ad penön us u menodön yegedis primanas. I binos frutik ad lölöfükön bukemi: 'Wikisource' (<https://wikisource.org/wiki/Category:Volapük>) < me vödems yönädik e nutimiks, bi mödiks jünu dabinois bevüresodo fomü magods tio nereidoviks.

Vipöl alane livüpi saidik pro bujäf  
redakan:

М%308  
ДАНИЛ

## Solagrahan.

fa ,Frank Roger', tiäd rigik: „The Solar Eclipse”,  
ini Volapük petradutöl fa ,Hermann Philipps'.

Jiel Wilma äslürfof kafi. „Del kiojönik binos!” äsagof.

Hiel Karel leigo äsumom drinodili. „Dido binon magifik”, äsiom.

Dü timil äjuitons solasvieti su bakun löda oksik e su els  
,espressos’ nämöfik, kelis hiel Karel imökom. Äjinos, das nos ökanon  
sädeköön deli magifik at.

Täno süpo boso läs älitos. Hiel Karel ädasukom sili ad tüvön kodi  
mögik atosa, ab sil äbinon leigöfiko blövik, e lefogil nonik ädabinon.

„Binos-li te fomäl obik, das dagikos bosilo?” äsäkom jiele Wilma.

„So jinos,” äsagof. „Ag! lindifos dü tim, das no reinos. Ga seadobs  
is vemo gudiko, vo-li?”

„Too jinos lü ob, das seimikos no binon baibinik.” Älogom löpio  
me logs tio pikobopedöls. „Logolös naedilo!” äsagom. „Jinos, das  
bos sleafon foi sol. Ab prüdolöd! No logedolöd nemediko ini sol!  
Atos okanonöv dämükön nesädunoviko logis olik.”

Jiel Wilma nogna änüşumof drinodili kafa oka, ed älemufükof  
kapi. „Kis binon-li säkäd ola? Atos ga no binonfefik.”

Vüo ävedos küpoviko dagikum. „Atos no mögon,” hiel Karel  
ätaspikom, „pö delalit klilikün, tü düp at, e nen lefog seimik!”

„Bo gitedol”, jiel Wilma äsagof. Jenöfiko ädagikos, äsva lefogs mi-  
stomülik itegons-la sili, u pö soaralulit. Nu ye so no äbinos.

„Mutos binön solagrahan”, hiel Karel äsagom, du sol älaimufon  
poi bos, kel te mun äkanon binön. Atos ye äbaibinon-li jenöfiko?  
Ätovädom telefonömi mödigeböfik oka ed äsagom jiele Wilma:  
„Oluxamob atosi.”

Pos pülatimil älölogom de skrinil äsagölo: „Ekö! solagrahanai nonik  
änunoy pro adel, ni löliki, ni diliki. Somikos ai panunon pö televid ed  
in gasesds. Is labob lisedi lölöfik, kel ninädon sola= e munagrahanis  
kömölis. Nos dabinon tefü adel. Mutos kluo binön votikos. Ab kis-li  
üfo? Bai notets at mun pö staned adelik okik nemögiko kanon tegön

soli. Ab kis kanon-li mufön pläo foi sol ka mun?” Vög omik äprimon ad tonön däsperiko.

Vüo sol pätegon löliko, e züamöp äbinon in lulit vemik.

„Ga no kudolöd,” jiel Wilma äsagof. „Din kisotik atos binon-la, bo opaseton. Fümo sol osükön dönü suno.”

„Ebo nog olülogob resodatopedis anik labü nulods. Somikos, äs solagrahan no pespetöl, ga muton pamäniötön in medäds.” Dönu äbejäfom stumi oka dü timil, kleilikö ye nen sek.

„Nosö!”, ävokädom, ven älölogom dönü, „vädi nonik dö atos kanoy tuvön. Lio atos mögon-li? No suemob atosi.”

Nu äprimos ad litikön dönü. Grahan piano äfinikon. Älülogom ti no natemölo, vio stad kösömkö änätikon. Pos minuts anik äseadons dönü in lit sola, kel äbesvieton bakuni lölik okas.

„Bo nu logol,” jiel Wilma äsagof, „das kod nonik edabinon ad fäkädükön. Sol svieton dönü. Grahan töbo etupon obis. Ga esagob, das no ödulon lunüpo.”

Hiel Karel älemufükom kapi fümädälako. „Vipob pläni nolavik dö atos, kel ejenon ebo änu. Zepol atosi tu fasiliko.”

„Ag! steifülolös naedilo ad juitön timilis jönik, nes lonülön säkis valik at!”

Hiel Karel älecedom osi visedikumi ad no geädön. Älülogom jieli Wilma, kel äjuitof solaliti ko logs färmik.

„Ba kafi nogna-li?”

„Vilöfö!” ägespikof. Älöikom ed ägolom lü kvisinop ad mököön elis espressos nog telis. Atos alo no öflagon pläni nolavik. ■

## **VÖDABUK VOLAPÜKIK=YAPÄNAPÜKIK**

fa dokan: ‚Kuriyama Hitosi’ < penotükön medü Volapükagrup di ‚Facebook’. Buk at pelauton ün yel: 1998. Lautan ona pämotom ün 1928, ädeandom tü 2000 novul 14, älödom in ‚Amagasaki’ (Yapän), kö ävobom as sanan. ‚Kuriyama Hitosi’ änitedälom dö yufapüks bevünétik difik, sevabo sperant, Volapük, ‚Ido’, ‚Interlingua’, äbinom liman sperantakluba di ‚Osaka’. Pö vobod at ägebom vödabukis fa ‚Ralph Midgley’ (pro Linglänapükans), ‚Arie de Jong’ (pro Deutänapükans), ‚André Cherpillod’ (pro sperantans). ■

# PENÄDS JENAVIK.

## 1. PENED SAPANA.

Sant-, Peterburg'. Nisul: ,Vasil'evskij', sütalien 5<sup>id</sup>, dom: 30, löt: 19.

1895 gustul 3/15.

Söle: redakan gaseda: „Kosmopolan”.

O söl lestimik!

Dälolös obe ad plänön flenes Vpa in kolums gaseda olik: gased tio teik, kel nog papübon me Vp suemovik, kodis säcalikama obik se kadäm, nendemü vobfefik e nitedälik dü yels mäl. Osaitob ledinis fa ob eloseidölis in spod obik ko dilekan kadäma, ed obrefükob onis. Säk binon:

*Kikodo esäcalikob-li se kadäm bevünnetik Volapüka?*

Gespikob: 1<sup>ido</sup>. — Ekoefob das, if odasumoy prinsipi dilekana — gebi fomas petuvööl in lepuks Yuropik mödikün — asä stabacedi le-teik, pük e gramat nulik, pedatiköls dub on, binons pötöfiks e tika-viks, ab too no baicedob ad vobön te ad sukön *puki nulik*.

2<sup>ido</sup>. — Pük nulik dilekana — ma samed pelägivööl tefü on len sir-küläpenäd 15<sup>id</sup> — jinon lü ob binön „migäd pemik bisarik binü püks latinik, Spanyänik e Litaliyänik, kel sümedon dialeg sevädisk jolas mela Meditäränik e binon boso leigamagodik tefü migädapük: „pigeon English’ di ,Canton’.”

3<sup>ido</sup>. — Vödem <blufik> püka dilekana mipliton obi: „vöds binons luniks, no benotoniks, nepötiks e suvo droliks.”

4<sup>ido</sup>. — Gramat nulik mipliton obi: „deklin e konyug me vöds föfo papladöls pla poyümots, binons pro ob votükam miserabik”; „Schleyer’ pro sufalefom te lenlägom tonati balik: **p**, e „konyug nulik flagon pro sufalefom siti lölük cenas e koboyumas.”

*Lulido, lätkna e lepato.* — Iniludob das ebinob-la liman kadäma bevünnetik Volapüka, das esötob fölon bagafi balid statudas:

„Kadem jäfom te lefulami e menodami glamata e vödabuka Datuvana” („Kadäm bejäfon te läfulükami e menodi gramata e vödabuka Datuvana”). Kludo, no kanob blebön liman kadäma ad *jafön*

valemapüki seimik votik, igo no eli ,*lingu nov intransonik!*! Pük at kanon binön fasilikum ka Vp *ad pasuemön pö reid*, ab obinon ai milna fikulikum *ad papenön e paspikön*.

Lägivobös vödi bal, meibi lätik oba, ibä, süadikölo das te stad deadik Vpa obinon tu sunik, cedob, das penob lätikna lü gased Vpik. Disins nulik e difiks ya davedons nu äs rein valaflano, soäsä ejinos timü dilekam söla: ,Kerckhoffs', ün tim, kü, pos kongred bevünketik Volapükanas, dü voladajonäd di ,Paris', edagetom tiketi neläbik ad mobön votükamis in Vp nezesüdikis e nenfrutikis. Ya egetob disinis sümik, de läxkadämal Vpa: söl: ,Heintzeler', de komitetanef Vpakluba di ,Hannover', e de Vpaklub di ,Königsberg'. Benovipob-la dilekani demü lemödot tupöl mobas e disinas, kel levemo oböladon omi, e kadämi demü kofud e neleod nevitoviks, kels odareigons pöräyun ona. Ob oleyilob kaoti at, e blebölo fiedik kol pük, kel ukanon vedön pükamedöm bevünketik teik, olüvob dämukanis e „sepülanis” voik Volapüka, ab i künob ad lebeg bal e lätikün, das söls at no obleibomsös nemön kadämi oksik dub nem calöfik, etaöfölo ta duns valik omas — „Kadäm bevünketik Volapüka.”

Ko glids, dünan divodik olik:

,J. HENRY HARRISON’: profäsoran Vpa e kadämal büükum pro Rusän.



,John Henry Harrison’ (nem Rusänik: ,Andrej Ivanovich’). Pemotom tü 1829 yanul 25 in ,London’. Ästudom pükavi e literatavi in niver di ,London’. Dü yels vemo mödiks äyufom fati okik pö vob omik (fat äbinom letedan e latikumo gasediman e redakan). Äfealotädom lü Rusän ün 1851, kö ätidom Linglänapüki. Äkoedom dabükön tidabuki Linglänapüka pro Rusänapükans e gramati Linglänapükik Volapüka. Bü yel: 1888 < ädagetom tituli Rusänik tatakonsäälala ed ävedom tidal ä dalagal in jul melañas (poso päfeafomon ad kadetajul marenik). Edeadom tü 1900 yanul 25 in Säntz, Peterburg’.

## 2. PENED MENODANA.

,S. Peterburg', 1894, X<sup>ul</sup> 16/28.

Söle: ,A. W. Bateman': redakan ela „Kosmopolan” in ,Sydney’.

O söl lestimik e löfik!

In nüm: 18 < gaseda digik ola tuvob yegedi: „Dabinon Volapük te bal”, in kel palesagos, das Kadem (= kadäm) bevünetik volapüka in ,S. Peterburg’ no besteifon menodi Vpa, ab püki seimik pötöfikum, e das pük nulik at pastukon nendemü stabanoms Vpa, kludo kadäm at no dalon nemön oki as „kadäm bevünetik Volapüka”.

Dälolös obe ad gevön plänis anik tefü yeged at!

Kadäm bevünetik volapüka leno dabinon in ,S. Peterburg’; limans ona binons in läns difik tala; te ob: dilekan nulik kadäma, sekretan e kädan dido lödoms in ,S. Peterburg’.

Kadäm labon statudis pelonöl fa kongred bevünetik ejenöl in ,Paris’ ün 1889 de VIII<sup>ul</sup> 19<sup>id</sup> jü 21<sup>id</sup>. In statud at panunos: „kadäm [kadäm] jäfom [bejäfon] te lefulami [läfulükami] e menodami gla= mata [gramata] e vödabuka Datuvala” (J. M. Schleyer’). Kludoy se atos, das kadäm söton bejäfon ebo menodi Vpa; too betikobsös, ad finasek kinik menod at dugon.

Sis gustul yela: 1893 kadäm bejäfon vödastoki ed esludon, das stamäds anik fa ,Schleyer’ pevälös binons so pötöfiks pro pük bevü= netik, das nek bevü kadämans ekanon mobön stamädis pötöfikum; stamäds somik binons a. s. *bakön, ban, ber, blam, basin, biskit, be= duin* e votiks pelisedöls in sirkülapenäd nüm: 6 < oba dätü 1893, d. 1<sup>id</sup> XI<sup>ula</sup>. Pro suemods anik kadäm güo etuvon stamädis, kelis cedon be= vünetikumis, kludo i pötöfikumis, ka stamäds fa ,Schleyer’ pevälös, a. s. *balen* pla el *valüt, dedikön* pla el *kösekön* [dedietön], *divan* pla el *söf, dromedar* pla el *kämel* [nu els *jamod* u *dromedar*], *frikön* pla el *röbon, fundön* pla el *fünön* e votiks pelisedölis in sirkülapenäds obik, nüms: 8 e 10, dätü 1894, d. 10<sup>id</sup> II<sup>ula</sup> e 24<sup>id</sup> VII<sup>ula</sup>. Revid sta= mädas Volapükik pafövon.

If nüdugoy stamädis nulik at ini Volapük, täno ogetoy natöfo puki nulik votik e no sötoy stunön dö atos; bligäd kadäma binon ebo ad

sukön fomis pötöfikum, e sek voboda somik muton dugön lü pük votik. Niludob, das kadäm jünu no enefölon stabanomis Vpa, ab koefob, das — ad jenöfükön staböfiko bligädi okik — kadäm osöton revidön i stabanomis. Finaseki somik jäfotas kadäma ekanoy büologön ya uttimo, kü estidoy kadämi.

<Igo> nedemölo atosi, füfans kadäma egevons one nemi: „Kadem bevünétik volapükä”. Se atos kanoy kludön, das vöd: volapük < pegebon is ön siäm ela „pük vola”, ön siäm ut, keli vöd at elabon jenöfo üntim stida kadäma e labon i jünu. Posä mätedans ela Schleyer emekons pükadisinis oksik ed egevons disines at nemis patik, vöd: Volapükä < edageton sinifi telid, sevabo mekavapükä fa ,Schleyer’ tapladü meka-vapüks votik. Somo vöd: Volapük < labon sinifis tel; sinif balid no penosükön dub sinif telid. In vödabuks fa ,Schleyer’, dabükot kilid (ed i folid), fa ,Kerckhoff’s’ e fa ,Wood’ tuvobs tradutodi: *Volapük* = „Welt-sprache; langue universelle; international language; universal language’. Bio kadäm gebon ad pük calöfik oka vödabuki fa ,Schleyer’ bai dabükot kilid, no küpob kodi ni gidi ad votükön nemi kadäma. Ab sötob lägivön is, das nem kadäma no kanon patradutön a. s. ini Linglänapük me ,International Academy of Volapük in S. Peterburg’, äsä ejenos in n.: 18 < ela „Kosmopolan”, ab söton patradutön me ,International Academy of Universal Language’. No nog kanob büologön, nemi kinik mekavapük ut odageton, kel ubinon finasek töbidas kadäma, bi ni stamäd: *vol* ni stamäd: *pük* < jünu pebespikons in kadäm; kanob te niludön, ma sluds jünuik, das stamäds bofik at no podasumons fa kadäm, kludo i nem püka ovedon votik.

Ofredükos obi ad loegön notikön penedi at in gased digik ola.

Ko lestim e glids flenorik binob, o söl löfik!  
dünan divodikün ola: ,Rosenberger’.

*Noet redakana: ,A. W. Bateman’*. Söl: ,R.’ digik ai ebinom voban vemo zilik e viktimälik tefü jafäd e nüdug valemapükä. Too cedob, das vöd: *Volapük* < ai pegebon jünu te tefü pük fa s.: ,Schleyer’ < pedatuvöl; e vöd: *väpiük* [valemapük] pegebon valemo tefü püks valik, kels pedatuvons pro gebäd bevünétik, keninükamü Volapük. Lesags

söla: ,R.' jinons blöfön, das kadäm bevünétik *Volapiüka* söton lasumón dili nema: *väpiüka* [valemäpüka] pla el *Volapiüka* ad vitön kofudükami. Ad gebön vödi: *Volapük* < telplanoviko ito baibinos ad viodön stabanomi veütik Volapük.

## **NULODS VOLAPÜKAVA.**

Binos veütik, das Volapük nulik (ü perevidöl) vedon yegäd vobotas nolavik. Bü yels anik atos ejenon pö penot ad daget dinita: ,Bachelor' tefü lekans fa el Zhang Yutong: kadäman soga bevünétik Volapük. Pe näd Linglänapükik at labon tiädi: ,A Phonological Analysis of the Word-Borrowing Process in Volapük' (= Vestig fonetik jenäda vödi=dütüla in Volapük) e binon dagetovik bevüresodo pö ladet sököl:

,[https://openscholarship.wustl.edu/undergrad\\_etd/30/](https://openscholarship.wustl.edu/undergrad_etd/30/)

Volapük — näi sperant e ,Toki Pona' — ün yel: 2018 < id evedon yegäd yegeda Linglänapükik sogäda=pükavik fa el Natalia Zorrilla tiädi ,Still Hoping: The Relation of IALs to Worldview and Perception' (= Spel nog dabinon — tef yufapükas bevünétik ad levalidaced e sumod). Ekö! ladet leáktronik pro nulälans: ,[https://osf.io/preprints/socarxiv/sj24a'](https://osf.io/preprints/socarxiv/sj24a/).

## **NUNOD CALÖFIK DÖ KOBIKAM VOLAPÜKAKLUBA RUSÄNIK.**

Tü del mälid yunula yela: 2024 poszedelo za düp mälid Vpaklub Rusanik sis yel: 2015 dabinöl ejenükon in zif: ,Ekaterinburg' kobikami oka. Pö kobikam at limans laidik tel kluba ekopenoms: söls: ,Oleg Temerov' e ,Daniil Morozov'. Ekolkömoms odi süto vü bumots cifik tel feda=nivera Luralänik lä mebamal futaglöpädanes. Dil cifik telspikota ejenon in staudöp nilikün stimü dodod penemöl. Yegäds mödik pebespikons, bevä votiks sököls:

1. Spod bevünétik Volapükik limanas kluba.
2. Bü yels anik Vpans jäfedik ädabinons in Sänt-Peterburg' e ,Moskva', ab nu nosdunons. Spel penotodon, das fütüro odönufövons jäfi oksik gönü Volapük.
3. Frutos, das doküms veütik bälđik dö Volapük pianiko pubons bevüresodo danädü bukemöps calöfik e pösods balatik. Liedo maters

nitedik mödik jünu defons, igo nüms ömik „sirkülapenäda” fa ,Ralph Midgley’. Vpans fütürük bo osevons dö pük obsik mödikumosi ka obs.

4. Id ebespikoy disinapükis votik ko jenotem liegöfik. Binos nitedik, das ‚Idiom Neutral’ fa kadäm säslopič nu padönulifükon bai lebuks yeslas: 1902, 1903, do ‚Rosenberger’ nenropo ävölfon oni lüodü sit sota: ‚Occidental’. Atos blöfon, das noms fümöfik binons zesüdikums pö geę bans yufapüka, ka süm ad püks romenik. Binos läb, das Vpans labons stabi nevotöfik fomü gramatabuk e vödabuk calöfiks — tapladü slopans sita neudik-la ko penäds nebaiädik labü tikamagots kaotik ela Rosenberger e timakompenanas omik.

5. Desins tefü traduts nulik ad liegükön literati Vpik pebespikons.

6. Vükiped Vpik e völad ona pemäniotons. Bo ozesüdos ad kopiedön yegedis resodatopeda at, bi okanon-la sunädo moikön, soäsä ‚Yahoo’ e topeds votik mödik.

7. Nutimo tradutians bevüresodik fomü ‚AI’ (täläkt mekavik) jäfidons pla yufapüks bevünétik. Igo tradutian somik di ‚Google’ pro sperant dabinton. Kanoy büologön nünömaprogrammi sümik pro Volapük. Too kvip binü pükavans, nünömaprogramels, blufans mödiks zesüdon ad „tidön” eli AI ad tradutön vödemis se ud ini pük ömik. Tefü Volapük nemögos ad fomön kvipi somik. Kludo u Volapük obleibon binön bal yufapükas nemödik, kels pogebons te fa mens, u ‚AI’ uvedon tikäl menasümik, e te nemödikans obinons skilikums ka nünöms tefü Volapükigeb. Pö jenets bofik mens no osötöns glömön Volapüki — pu ad redakön tradutodis smilikodöl de ‚AI’.

## MAGODIL NULIK: ‚MEME’.



## DOG ELAS ,BASKERVILLES'.

### KAPIT VELID. ELS ,STAPLETONS' DI ,MERRIPIT HOUSE' (6).

„Binon böd vemo seledik — ledino edadeadon — nu pö Linglän, ab valikos mögon pö maräd. Si! no ostunoböv dö utos, das uklülädobsöv lilön rori bala boturas lätik.”

„Din at binon dremälabikün ä bisarikün, keli föro äliblob dü lifüp obik.”

„Sio top at binon valemo go miklänöfik. Lülogolös lubela-kliivi et! Magädi kinik kodon-li pö ol?”

Kliv skapik lölöfiko pätegon fa lins sirköfik binü stongedik, mödotü nemu teldeg.

„Kins binons-li ats? Jipaceks-li?”

„Nö! ats binons lödöps ruröletanas dalestümabik obsik. Mens rutimik äbelödon marädi densitiko e, bi nek pato siso älödon is, ai tuvobs konömömis pülik valik büanas, leigoäsä utans eposbinükons onis. Ekö! ludom balana utanas nen nuf pe-deüköl. Igo okanolöv logön filatatopi e bedi utanas, üf labolöv nuläli ad nügolön.”

„Ab at ga binon zif. Kitimo pebelödon-li?”

„Mens stonatimäda nulik; period no pasevon.”

„Me kis äjäfons-li?”

„Äbälättons veteri oksik pö lubelaklivs at ed idalär-nons ad sesepön<sup>1</sup> stanini, ven gläv bronsötik iprimon ad plaükön cüdi stonik. Lülogolös söpi gretik pö lubel vi-soik! Atos binon retod dabina menas et. Si! otuvol topis anik mu patiks pö maräd, o dokan: ‚Watson’! Ag, nenzogiko säkusadolös obi! At fümo binon el ‚Cyclopides’.”

Musak u pab smalik ilufliton love luvegil obsik, e pos timül ‚Stapleton’ mu süpiküno lezilo ijutedom ad vifiko pöjutön oni. Lejeko äloegob fliton jafäbi stediko lü mar

<sup>1</sup> Sesepön = ‚to dig for’.

gretik e love:bunön kompenani obik de lubelil yebatufagik bal sui votik, paudi dü timül pülik nonik laböli, du fanafilät grünik omik äfänädon pö lit. Klotem gedik e muufs letirik zigzagik nemomädik omiks äsümükons omi it ad pab seimik gianik. Ästanob, küpedölo pojuti omik, ottimo senälölo stunidi demü jäfäd plödakösömk omik e ludredi tefü utos, das ökanom pölatridön pö mar cüti:döl, ven älelilob toni stepas ed, igüikölo, äküpob vomi nilü ob pö luvegil. Ilükömof de lüod, pö kel lefogil smoka älüjonon topami ela ‚Merripit House‘, ab donikamageilot mara änelogädükön ofi, jüs istanof vemo niliko.

No äkanob dotön, das äbinof lädül: ‚Stapleton‘, dö jikel inünoy obe, kodä vomüls alseimik ämutofs nemödön pö maräd ed ämemikob, das ilielob bepenön seimani ofi as jijönan. Vom äniliköl lü ob go fümo äbinof somik, efe vemo nekomuniko jönik. Taäd vemikum nonik äkanonöv dabinnön vü blod e sör, bi ‚Stapleton‘ älabom skini neudakölik, heremi blonik e logis gedik, du äbinof dofikum, ka blägajheran<sup>1</sup> alseimik, keli ilogob pö Linglän; i lunedik, deköfik e geilik. Älabof logodi pleidik feinik, sovemo nendöfiki, das äjinonöv nenlefäkik, if pö on no ädabinonsöv mud señätilabik e logs jönik dofik vifilik. Dub maged nedöfik e klotem klotugik ofiks go äbinof späkamaged bisarik pö vegil soalöfik marädik. Logs ofik älüodons lü blod ofik, ven äflekob obi äl of, ab täno äjutedof lü ob. Ideükob häti obik e tio äprimikob ad sagön pläni seimik, ven vöds lönik ofik ilüodükön tikis valik obik ad lüäl nulik.

„Gekömolöd!“ äsagof. „Gekömolöd ebo lü ‚London‘, nenzogo.“

Äkanob te logetön lü of fopiko dub süpäd. Logs ofik älülulogons obi levemiko, ed ätagof ta glun nesufädiko me fut okik.

---

<sup>1</sup> A brunette (woman)‘.

„Kikodo mutob-li gekömön?” äsäkob.

„No kanob plänön atosi.” Äspikof me vög spetäтик ne-laodik labü säy bisarik pö pron. „Ab Godo fölolöd utosi, kelosi begob ole. Gekömolöd e neai onüvegolöd ad maräd dönü.”

„Ab ga ekömob ebo änu.”

„Godö!” ävokädof. „Ga no kanol suemön nunedi gönü ben olik, vo-li? Gekömolöd ini ,London! Motävolöd aneito! Lüvolöd topi at ön mod seimik! Sö! blod obik isio-kömom! Sagolöd vödi nonik dö utos, kelosi esagob! Kanol-li plökön rogidi et pro ob bevü els ,Hippuris vulgaris’ et? Rogids vemo bundanons pö maräd obsik, ab ga boso elatikol ad logedön logöfotis jönik topa at.”



Stapleton’ istöpedom yagi ed ägegolom lü obs, änatemölo töbiko ed iredikölo dub tutöbidam okik.

„Glidö! o ,Beryl!” äsagom, ed älüjin os lü ob, das tonod glidota omik leno äbinon ladöfik.

„Ö! o ,Jack! binol vemo hitik.”



Fövot ponotükön.